

## 食酒 江秀鳳(四縣腔)

鄰舍阿叔个俾仔出車禍轉到屋，阿叔看細仔人無麼个外傷，又肯睡目，就話著無要緊，頭擺人醫學知識識毋多，到天光正知細人仔全無氣脈，續來過身。厥屋下就降一個單丁子，兩公婆艱苦盡久，吾姆愁佢兜忒過傷心無煮飯食，實在係驚佢兜想毋開，三不二時送兜自家爛(tag\、)个粽仔、油飯、粿仔去厥屋下坐寮打嘴鼓。

因爭係九歲个細人仔無忒，客人个風俗，無人舉辦喪禮，簡簡單單火化，阿伯、阿舅盡親个親戚來安慰定定。

一直到年下仔，阿叔來拜託吾姆，講想愛渡佢去看電影。會過年仔，天時當寒，吾姆摺佢著一領貴貴个襖婆，裡肚係一領紅色个衫，烏色个長褲，叔姆無去，單淨阿叔渡佢，佢喊計程車載，毋過，無渡佢去看電影，嘎去到婚宴現場，排場當大，還派頭哪！阿叔拿出帖仔，有人帶路坐桌，佢兩儕坐下來，坐脣項个朋友問阿叔：「這係若妹仔係無？還得人惜喔！」阿叔教佢這喊阿叔、該喊阿姨，佢就踉等喊，臨時做別人个妹仔，心肝肚試著怪怪，乜毋敢講麼个，該餐幼席旨食忒，阿叔就摺大家敬酒，還講有事情愛先離開。

在屋下上計程車後，阿叔有交代，愛渡佢去食酒，食酒食好會帶佢去看電影，該暗晡在恁高級个飯店，食麼个好料理，全毋記得，淨記得阿叔密密同佢挾菜，喊佢煞猛食，佢恬恬緊食毋敢多嘴，阿叔還吩咐轉到屋下，做毋得摺吾姆講佢渡佢去食酒，就講係去看電影知無。故所菜旨出忒就渡佢離開，正正經愛帶佢去看電影，又驚怕忒夜轉，電影乜看無透尾就牽等吾手離開電影院。

在計程車頂阿叔又再過吩咐一擺，喊佢毋好摺吾姆講佢渡佢去食酒个事情，幾下日前就摺吾姆講愛渡佢去看電影，佢單淨緊領頭無應話，心肝肚想大人仰會恁多秘密，這做毋得講，該乜做毋得講，吾姆輒輒教佢做毋得講花撩，今晡日轉去愛仰結煞正好哪？

吾姆盡會思量人，話著鄰舍阿叔係因為俾仔來過身，想俾仔正會想渡佢去看電影，好回憶摺俾仔共下个時光，吾姆全無想著，係阿叔接著一張喜帖，該係當重要个做官人愛討心白，無去做毋得，官場朋友大體知佢有細人仔，怕無已清楚係俾仔抑係妹仔，一般大場面个高級餐廳有按算人額，阿叔怕係準備摺叔姆共下去，叔姆毋肯去，正會高不將渡佢去，阿叔食酒摺看電影全無心無性，這下恁起來佢乜試著盡毋盼得。

2018.5.17 台中 55 路公車頂